



七月半

臨暗頭，俚看著逐家人屋个頭前，擺起一張一張个桌仔，桌仔頂高擺等牲儀，有雞鴨、水果、米飯、罐頭、麻糍、米糍、餅仔、汽水……這兜普渡个用品，擺到滿桌淦淦。逐家人誠心誠意斟酒、點香，插起滿街路馨香、光明个路燈。當下，心肝頭怩(nid)怩一下，俚試著自家就像遊遊野野个孤魂野鬼，一儕人行在中壠个街路頭。

該係俚三十年前讀中壠高中，愛上三年生个暑假。毋記得係為著準備明(mang)年个大學聯考，抑係參加學校个學習輔導。轉夜時節，對學校頭前个中央西路開始，一路經過中央東路、元化路、健行路、火車頭後背个健行工專，轉到厝屋个位所。俚看著路脣兩片个人家，在香案桌頂、屋脣兩片插等一支一支个香。一點一點紅紅个香，就像路燈、也像指標，指引等孤魂野鬼——好兄弟，去到人家屋面前，分虔誠个主人招待。

七月半，自家一儕人，在臨暗時節，行在中壠个街路頭，看著這普渡个情景，強烈感受著自家又孤單又孤栖啊！心肝肚想，俚單單一儕人在中壠讀書，屋下當遠轉毋得，親人無在身邊無佷憑……，該央時，就話著自家係孤魂野鬼，順等街路行，緊看人家準備个祭品，緊食人家細心細意準備个牲儀，塞入自家个豺嘴，塞飽自家飢飢个肚屎、胃腸。

俚知孤魂野鬼，無人承受！佢兜毋係神，平常時無信眾奉祀；佢兜毋係祖先，平常時無子孫服侍，萬善祠係佢兜集會个場所，有應公、大眾爺係陽間善男信女對佢兜个尊稱！俚毋知孤魂野鬼旨到七月个日常，仰般生活過日仔，毋過俚心肝肚知，佢兜應該孤單、佢兜定著遊遊野野，緊尋一個定疊个所在。

今年七月半普渡个臨暗頭，俚又惱起三十年前，行在中壠街路頭，該種強烈孤栖个感受，黏時湧上吾个心肝頭。俚無想愛像孤魂，無想愛像野鬼，乜無想愛一日到暗，在外背遊遊野野。俚總想望有一間屋好戴，有定疊个生活好過，未來有人承受，有人想念。

作者：邱一帆

☆詞彙學習☆

【麻糍】ma^ˇ lau：米製品。

【米糍】mi^ˋ lau：米製品。

【普渡】pu^ˊ tu：以祭品、儀式超渡無主亡魂
或好兄弟。

【怩怩】nid nug：觸動驚嚇。

【厝屋】piog vug^ˋ：租房子。

【佷憑】va^ˋ ben：依靠。

【豺嘴】sai^ˇ zoi：貪吃的嘴巴。

【有應公】iu^ˊ in gung^ˊ：奉祀於小祠的無主骸
骨和無主孤魂。

【大眾爺】tai zung ia^ˇ：奉祀於小祠的無主骸
骨和無主孤魂。